

甯志備考序

吾甯邑志修於嘉靖乙卯迄今已七十餘載中間官方
戶口土風民物其沿革損益不能不與歲月俱遷流而
紀籍零落故老凋謝則文與獻咸不足恃識者往往抱
蠹冊而怒如崇禎乙巳夏邑侯甌甯謝公慨然有意修
葺錄其所編次副本若干卷強屬不佞逡巡謝不敢承
則轉以屬趙無聲先生不佞私竊為茲志幸得人也先
生志節懍懍嫉惡如風而開敏博洽於書鮮所不讀於
世故物情鮮所不諳解以彼其才是宜抽金匱石室之
藏以潤色鴻業於一邑志何有既董筆受事業有端緒
而浮言間之侯亦憂去於是綜其前後所摭摘者彙為

甯志備考序

一

一編而題之曰甯志備考備之為云以言乎業之未竟
也雖然於吾邑誠為未竟之業而於先生直為一家之
言乎哉蓋先生之說曰離經譯史稽古證今是吾輩讀
書事志不可不修書不可不讀不佞殊有味乎其言修
志所以經一邑也讀書則非為一邑讀也先生雅負經世
之志而跼蹐寒羶無用武地不得已而以其牢騷感憤
寄之乎吟詠俛仰憑弔之間其情悲其風期固已
遠矣顧不佞自為吾邑慮竊謂志終不可不修而有先
生備考在將異時秉筆邑乘者事半功倍恆必由之故
因先生問序而輒為原始題之簡首庶先生苦心或亦
藉是以不泯云

南京工部左侍郎奉
詔晉階資政大夫邑人祝以函撰

甯志備考序

二

邑志考引

志安昉昉於春秋春秋者孔子不得志於時所為作也
今天下郡邑皆有志秉筆者不惟其爵惟其人他不具
論令典四月淮陽亦嘗舉先為廣文時所草而彙之為
淮陽志矣吾甯古鹽官縣更而州州又更而縣代居海
國無虞播遷而近乃罹海患劇守土者方日夜憔悴畚
鍤紛紛又奚暇弄不律圖不朽為當湖趙無聲先生者
其學博綜抉奧其下筆排山倒峽而其人則慷慨木強
自庚子逮今困公車三十年研穿裘敝邑邑不得志乃
退而振鐸吾甯登壇之日凡士之翹楚必拔不爽躍冶
必創不貸不蘄諧俗而蘄諧理遇公正一發憤不避忌

甯志備考序

三

袒左右聽者解頤心服五年於茲每恨邑志築舍以忝
文獻乃為作備考其目凡十有二其法詳古畧今詳舊
畧新則吾因是而重有感於今也自日用飲食以至衣
冠言動自鐘鳴鼎食以至甕牖繩樞目之所睹耳之所
聞無一衷於古而懷於舊者矣獨一郡一邑然乎哉積
妖釀災遂至犬羊訐於北魚龍吼於南所在不甯吾邑
倍遭其毒斯時也誠得志而志之覽古傷今砥新還舊
俾怒濤息而匏歌興所係豈尠哉既脫稿為付厥氏將
擊易水而游曲江迺以玄晏屬典得毋謂吾友者不欲
得其語而惟典之友也意典拙不逢年戇不諧世差足
武先生之後塵也乎先生不得志而作備考余不得志

而為備考序其歸一而已矣維時偶憇郡北別業朱葉
盈眸綠蔬適口時雨新霽種種快人正泚筆而先生惠
焚餘至亟讀客問盡吐肝膽皆言人所不能言不敢言
者一切知罪無所撓其慮又何有於邑志之一鱗
崇禎庚午陽月第八洞天外臣許令典識

邑志考引

史不得其官不傳不得其人不傳不當散佚漫漶之時不傳古今自龍門外作者寥寥非泐泐不經則訛漏無當所謂其官是其人其時非也天下郡邑山川禮樂財賦政事人物之屬各有紀載亥豕之訛隨時刊定則信而傳傳而可久吾邑乘蕪廢踰一甲子矣受事茲土者或手摘簿書棘刺難脫或放情流浪說鬼談神而於乘誌則棄如嚼蠟所謂其時是其官是其人非也吾無聲趙先生以端品積學振鐸吾甯日與羣弟子冥摛逖覽上自星緯雲石下自鳥獸草木中及興亡成敗悔吝憂虞之故靡不朝夕殫究既彙快編作渡世津梁而更以

甯志備考序

五

其餘暇弔平原睢陽之遺烈挹紫薇橫浦之流風每俯仰滄桑沈寥增慨時邑使君有敦趨先生登壇橐筆為邑乘計者先生意廓落殊弗屑喟然曰惡乎誌八騶雙戟雖盲亦史屈首一經而不得志於時縱使眼如箕口如河腹如筍穎君子墨亦將匿笑於石田之側乃退而作備考曷備乎文獻無徵志士扼腕後世得知己足以不憾亦曰備乎云爾所謂其時是其人是其官非也今天子銳意文治羣彥鱗集使先生進而備中秘又進而備顧問名山之業方駕子長庶幾官不負人人不負時立言其有籍乎予小子且得載問字之酒與先生上下千古焉茲因備考之成而姑述其幽憤之概如此若致

美文詞以為信且傳傳且久則吾豈敢
崇禎庚午立冬日門人葛徵奇頓首拜撰

甯志備考序

六

甯邑志考序

古有良史才未必有良史品品與才俱良而不能身任
怨勞內私其好憎外怵於威富將傳穢傳寃為禍等烈
即今實錄難成成且屢遷改秉筆之難概可觀矣予有
平水土之責於甯間或握符治甯事古昔嘉言懿行今
日土性民風亦既遐覽而洞悉之洋洋大海滂渤洗洋
非尋常一管城子所能傳信也有第一人趙無聲先生
者為甯士師六年以刪潤二十一史墨汁之餘譔甯志
備考采詳鑒慎獨斷獨成比於舊志倍十之五雖近事
少所增入而耳目之前易為簡括後有秉筆者稍加采
輯即是全書直命曰志可耳惡乎備余受讀卒業而知

甯志備考序

七

其造於甯者大也爰捐俸錢以襄劖氏文出乎一手而
功竣於三旬更數十年時移事換有民社之任者將文
獻乎斯編以續之則余實為之嚆矢云
崇禎庚午十月之望攝杭州府知府事古黔劉元瀚羽
波父序於子瞻隄畔

小引

周禮外史掌四方之志今郡若邑博士古外史秩也國初郡邑博士得參中秘之席百年來第飽苜蓿而歎侏儒嗟乎博士不當史耶吾師無聲先生冥摛逖覽上下二千年間既已多所撰著迺頃來振鐸吾甯登壇之暇復讀甯志而喟然以諸生請輒操不律從事及成又遜謝不任志題曰備考嗟夫人禍天刑史往往有餘懼先生其慄昌黎之誠與所載筆大較詳往昔而闊畧耳目之前蓋郭泰不臧否人物庶幾近之雖然漢書成而雜記不廢於西京晉史出而世說終傳於江左有如明詔忽下分遣黃衣使者采蘭石渠之副不能遺甯甯

甯志備考序

八

又奚能置是編表東海之雄風也抑生有說焉太常博士叔孫通既綿蕞漢儀奏曰諸弟子儒生隨臣久與臣共為儀願陛下官之高帝悉以為郎先生亭亭孤節干霄直上度必不願為叔孫吾黨小子請以魯兩生服膺先生可乎海昌門人談以訓拜手謹識

凡例

一修志之說起自戊辰夏時諸生有嗜古者伎癢呈縣
縣令弗省已矣踰年己巳春余方襄試會城而令忽
移牒理前事余亦姑置之逮夏五試竣始傳檄採故
實迺未幾而居奇之議起余遂一意謝絕惟是離經
譯史稽古證今自是吾輩讀書事志可不修書不可
不讀則備考所由作也

一是編卷凡十二幾十五萬言而於邑志及談子外志
戒弗敢掠美第間摘其一二之必不可缺者余所主
惟圖經郡志而參以歷代正史本朝典則典故憲章
通紀旁郡邑志等書更及百家雜說凡關涉甯者一

甯志備考例

九

切不嫌獵取要以藏書甚貧掛一漏萬亦曰聊以備
考云爾

一編中分門標款不盡摹古如儒官之不列縣屬也名
臣名儒諸目以易鄉賢也牧政流績以易名宦也文
夫女子總彙為獨行也水利之別於山水也祠廟之
別於寺觀也此皆微以臆見評定亦惟是一家之言
不妨直任其愚以俟異時之秉筆邑乘者

一編中詳古畧今其於今也又詳舊畧新懼古事易湮
信舊人論定也若嘉靖丁巳後為邑志所未入者雖
事堪垂則人足儀世概不得輕置品題或以大義相
督不得盡謝亦必於本條之下明註某某記令讀者

知說所自來易於摭剔簡證云

一志者記也猶里人言記取日記云耳義貴質貴核雕繪無取焉矧備考猶為記之記乎近古泚程畸人令侯為余作志局諸名士於局令士各獻竒以故文多異彩顧丹鉛太工識者不無諛墓美新之憾余老矣吹影鏤塵故非力所及樸而俚即目為里人無辭焉一是編捐俸助梓繫惟明府劉公為政而始終拮据克襄厥成則太學陳梁庠士吳維熊實與有勞法得並書

崇禎庚午冬孟雪日當湖鈍叟趙維寧識於海昌之天濤閣

甯志備考目錄

卷一

沿革

星野

疆域

形勢

山水

山嶺

龍湫

泉洞

井石

池海湖浦

城池

坊市

衢巷

橋梁

郵傳

卷二

壇壝

祠廟

公署

分土

甯志備考目錄

一

編戶

風俗

土產

土貢

卷三

土賦

課程

征徭

鹽課

郵政

卷四

水利

海患及治海類
河防及治河類

祥異

古蹟

邱墓附

卷五

縣官制

鹽監官制附

縣官題名

鹽監官題名附

牧政

流蹟

卷六

學宮制 社學射圃附

學田學租附

學職 官制體統題
名宦績併

禮樂

卷七

典籍 舊藏書目
邑先輩著述目

續藏書目

選舉諸科 特薦辟科
懷才抱德科

明經科
賢良方正科

進士科
鄉貢科

稅戶人才科
鄉舉科

附武科
鄉貢科

附武科
鄉貢科

卷八

名賢後賢附

名臣良臣附

甯志備考目錄

二

卷九

名儒文人附

逸民先民附

獨行懿行附

義俠

流寓

方伎

卷十

武衛 官制額
民兵額

署寨

軍額

軍糧額

方外 僧寺

道觀

禪宗

玄宗

佚事

卷十一

遺文類 序文

記

劄

贊

誌銘

卷十二

遺詠類 古

律

絕

頌

目錄終

甯誌備考卷一

當湖鈍叟趙維寰輯

沿革 一之一

海甯縣屬杭州府周以前甯地介在吳楚越間未知誰屬自秦代周罷封建置郡縣而以吳越地置會稽郡領縣凡二十四時在杭者曰錢塘曰餘杭曰富春曰海鹽漢代秦高帝之十二年封劉濞為吳王吳領縣二十六其在杭者五而海鹽仍與焉東漢順帝永建四年分浙江以西為吳郡統縣凡十三其在杭者三而海鹽仍居其一班固漢書注曰海鹽縣故武原鄉有鹽官輿地廣志云鹽官本漢海鹽縣地吳王濞煮海為鹽設鹽官於

甯志備考卷一 沿革

一

此後因以為名是鹽官在秦漢時其地皆隸海鹽未名縣也嘉興志云三國時吳大帝黃武四年割由拳海鹽二縣地為鹽官縣唐書輿地志亦云三國吳置鹽官縣然則鹽官之名縣實始自孫吳矣晉太康元年分天下為十九州州統郡郡統縣時吳郡屬揚州統縣凡十一而在杭者三曰錢唐曰富春曰鹽官覲晉自是歷宋齊梁鹽官皆屬吳郡陳武帝永定二年割吳郡之海鹽前京鹽官三縣地置海甯郡治鹽官覲陳後主禎明元年割海鹽縣屬鹽官地見吳記是年置錢唐郡尋改吳郡為吳州而以錢唐郡屬焉鹽官仍屬吳隋文帝開皇元年罷吳州及海甯郡而改吳郡為蘇州陞錢唐郡為杭州廢

鹽官入錢塘屬杭州

隋書云平陳置杭州舊置錢塘郡廢

煬帝大業三年

復改杭州為餘杭郡仍置鹽官屬之廣輿志云隋時鹽

官屬餘杭疑此時也

州一曰大業二年改杭為錢唐郡恐非

唐高祖武德

元年四年曰罷餘杭郡復為杭州領縣四惟錢唐餘杭於

潛新城而鹽官不與焉唐書云武德中鹽官屬東武州

七年省鹽官入錢唐貞觀元年分天下為十道杭屬江

南道杭時領縣四而鹽官仍不與則以前省入錢唐也

四年乃復置錢唐置鹽官縣廣輿志云唐時鹽官屬杭

州蓋在貞觀四年後矣玄宗天寶元年復改杭州為餘

杭郡領縣九而鹽官居其一肅宗至德二年仍改餘杭

郡為杭州鹽官仍隸杭州武宗會昌四年陞鹽官為緊

甯志備考卷一

二

縣五季朱梁初錢鏐為吳越王杭時為國屬吳越國臨

安志云朱梁龍德三年析錢唐鹽官地置錢江縣今仁

和即錢江也宋太宗太平興國三年吳越國除杭復為

州鹽官仍隸杭州建炎三年高宗南渡都臨安陞杭州

為臨安府領縣九前此九縣有紫溪唐山而無仁和昌

化建炎九縣即今之九縣自是不復更矣紹興五年鹽

官陞上縣尋復與外六縣並陞畿縣元世祖至元十三

年仍改臨安府為杭州十五年又改名杭州路二十一

年又改杭州路為浙江行省而鹽官之屬杭俱如故成

宗元貞二年以戶口繁盛陞為州文宗天曆二年以海

患甯息始改鹽官州為海甯州入明吳元年杭州行省

內附仍改路為府洪武二年仍改海甯州為海甯縣隸
杭故總之一海甯也而其名凡六最初曰海昌府在三
國吳曰鹽官縣在六朝陳曰海甯郡在元曰鹽官州又
曰海甯州其曰海甯縣則定自本朝云。按三國志獻
帝建安八年陸遜以東西曹令史出為海昌屯田都尉
兼領縣事夫漢晉間止有海鹽鹽官而三國時已有海
昌吳錄地理志云鹽官本名海昌吳時改名鹽官而沈
約宋志又云非也鹽官乃漢舊縣葛澧錢唐賦亦云於
潛鹽官起自漢家然則海昌之名始自何代無從考矣
星野一之二

星野之說頗屬荒渺似可存而不論顧據占考驗亦自

有不盡証者請據述舊聞俟知星者測焉周禮保章氏
註星紀吳越斗牛分野漢地理志吳地斗分越地牛女
分陳卓范蠡諸人分星丹陽入斗十六度會稽入牛一
度由此觀之杭嘉在斗牛之間而鹽官正在杭嘉之間
大較可知矣粵稽春秋以來魯昭公三十二年夏吳伐
越史墨曰越得歲而吳伐之必受其凶不及四年越果
滅吳漢孝景二年七月丙子火與水晨出東方因守斗
占曰其國絕祀斗吳也又為越三年吳連七國及吳王
亡走越越攻而殺之國除元鼎中熒惑守南斗占曰熒
惑所守為兵亂守之久其國絕南斗越分也其後越相
呂嘉殺其王及太后漢兵之滅其國東漢熹平元年十

月熒惑入南斗中占曰熒惑所守為兵亂斗中為吳是
年十一月會稽賊許昭聚眾自稱大將軍晉安帝隆安
四年正月月犯填星在牽牛五月孫恩破會稽復寇海
鹽劉裕追擊破之宋大明八年六月有流星大如五斗
甌赤色有光照見人面尾長一丈餘從參北東行直下
經東井過南河没占曰民饑吳越有兵其後兵起殺傷
甚眾隋大業九年五月熒惑逆行入南斗色赤如血如
三斗器光芒震耀長七八尺於斗中句已而行占曰有
反臣兵大起斗吳越分反臣楊玄感父封於越朱燮管
崇亦於吳郡擁眾反唐建中十九年三月熒惑入南斗
色如血斗吳越分色如血者旱象也太歷十年正月歲
星熒惑合於南斗占曰饑旱吳越分也光化三年十月
太白鎮星合於南斗占曰吳越有兵宋建炎元年秋斗
牛間有紫氣冬十月孝宗生於嘉興次年高宗移蹕錢
塘定都百五十餘年凡此皆占驗之歷歷著明者是安
得以六合之外而概置之

疆域 一之三

宋圖經云鹽官縣西北一百三十里舊二十二鄉今九
鄉本漢海鹽由拳二縣之境見太平寰宇記

縣志載此於沿革中

非是宜改 其詳載縣志及外志
入疆域 一之四

錢塘屬邑鹽官為最在浙之朝陽為吳之右臂白鋪江

面青點海門，層樓起而蟠練橫。星漢低而枯槎活，潮生信大雷。霆藏龍戰之聲潤，下功深。蜀井喪虎形之味，僧

贊甯惠力寺記

江防輯略云：甯邑南有赭山，實惟江門東。有黃灣，實通海港，兩端相距百四十里，而中無城守。先年島夷屢犯，首趨龕赭，後據石墩，人民死徙不可勝數。苟有巖城扼其險要，使賊無駐足之所，東不得過，素花而窺，硤石南不得浮錢唐而犯省會。縣治得此，兩翼庶不獨當風波之衝。此亦經海之總要也。餘詳邑志外志。

山水一之五

自甯邑西南望，則有葛嶼山。去葛嶼東一里為盤山，盤

甯志備考卷一

形勢

山水

五

山南去八里為赭山。赭山西里許為禪機山，東半里許為文堂山。諸山皆瀕大海。赭山與越之龕山南北對峙，而海潮出沒其間，是謂海門。山有獐獾、雉雀之屬。

雷山在江心，山形圓小，雅稱翠鬱。

巖門山穹窿峭拔，疊嶂蟠薄，故號主山。山有塔，東去十里為蜀山，西一里為河莊山，又東一里為胡家山。舊名黃山，一曰越山。山無佳植，獸有獐獾、狐兔、鳥則文雉、鴉雀。

茗山植有竹、松、烏有山雞、鴝、鶻。

山在治西北

硤石山二，一曰審山，號東山；一曰紫薇山，號西山。二山

相對中隔河流而皆在硤石鎮土人合稱硤石山云

自硤石山以下皆在治東北東南

花山坦夷盤薄如崗如陀山多白鷗火鳩亦茂松竹

黃山巉巖峭拔其植有楊梅山茶

菩提山即靈泉山也山有靈泉井因以名山植多桂竹

鳥有鷓鴣文雉

錢山舊多水仙今所植多蒼松翠竹鳥有鷓鴣山雀

小尖山去石墩里許登小尖西望石墩猶邱阜耳

妙果山綿延尖聳其尾鑿斷即為素花山故素花一名

龍尾

夾山卉有菊植有桃竹松檜禽多文雉鸛雀獸有兔狸

甯志備考卷一

六

○嘉興志云以其居金粟金牛之間故名夾山海鹽

有金粟山

尖山萃律崛起亞於金牛上有高峰可百丈許周十里

其巔置烽堠南臨大海鳥有白鷗文雉

黃灣山山形聳峻林木蒼鬱植有斑竹鳥有白鷗畫眉

獸則獐兔

金牛山高三百丈許望之蒼翠青鬱多雉兔獐獾之屬

○吳地記云海鹽縣西五里有會稽山是陸華兄弟

逐金牛處○按海鹽今無會稽山而甯有金牛山則

金牛即會稽也然金牛去海鹽約數十里而記云西

五里何歟詳外志

自金牛稍北為廟山山形深窅洞曲其西為鳳凰山下有烽堠其東為崧山又東里許為望夫山山形峭拔亦置烽堠其上自廟山以下諸山皆無奇花異植烏龍山在談山東二里許山形壁立昂峙若翔若翔水清能鑿毛髮

石棋山巖阻幽邃窳窳岑蔚

諸山之外尚有橫山蠲山管山箬帽山黃陀山白鶴山葛嶺山青陽山中亦有佳者具詳談子外志其自葛嶼以下山形高下與在縣之東南隅去縣道里遠近俱詳邑志不錄

甯之嶺一曰赤兔嶺一曰赤土詳邑志外志

甯志備考卷一

七

甯之洞三曰蜀山洞曰紫薇洞曰金牛洞俱詳邑志。圖經云金牛洞甚深曾有好事者游焉入其中見蛇怪自是游人遂絕

甯之石五曰望夫石曰怪石曰箭石曰盤蛇石曰秦王磨劍石俱詳邑志

甯之水莫大於海海在縣南十里。按海去縣十里據縣志言也余自萬曆丁巳游甯出城南望海無所見時吳亦臨令甯余問之曰沙漲三十里許去海遠矣及天啓乙丑余至甯出城南僅百步而大海已偏几硯間於觀濤甚邈至丁卯戊辰則沙復漲十里許及崇禎己巳秋十里沙隄不半月忽盪盡潮勢洶湧仍

偏城百步而近脫海若未肯悔禍恐甯民未得安枕也然戊辰之七月廿三日海嘯殺人無算是時沙隄十里宛然無恙而卒無救於甯則沙之有無亦何關利害乎滄桑之說自古有然要在甯吏甯民修人事以應之耳

甯之湖十有五曰臨平湖。圖經云臨平湖今大半屬仁和縣沿革所謂析鹽官地為錢江縣者即此是也。曰建興湖曰谷湖曰竹浦湖。圖經云舊有寫本圖經載建興湖深五尺勝百斛舟谷湖竹浦湖並深五尺勝八十斛舟今皆廢。按圖經考異云寫本圖經作建興湖臨安志則云吳建甯中開名建甯湖今故老

甯志備考卷一

八

洞石海湖

相傳無建甯之稱當是臨安志誤

曰淡塘湖。圖經云淡塘西至府九十里章瑋作兒童塔記云直縣之西有水曰淡塘其派自錢源來惜乎來脈雖遠而源流不深故未能有佳驗苟濬之使深當富貴世世不絕往魏伯珣宰邑邑人張少良嘗贊是役竟不果

曰郭店湖曰新江塘湖查二湖源流止是一水獨郡志詳於郭店邑志詳於新江耳

曰高湖曰月湖曰硤石南湖曰茶湖曰縣市湖曰二十五里塘湖曰洛塘湖曰袁花塘湖曰彭墩湖以上諸湖源流及去縣治方隅近遠俱詳邑志

甯之浦凡二曰黃灣浦曰百尺浦。按邑志二浦皆載入水利余謂浦即湖港之類今黃浦清浦皆以水得名非論利害不得入水利

甯之港凡十三曰白彈港曰黃土港曰吳姚塘港曰石棋港曰夾山港曰秋門涇港曰天門港曰馬牧港曰褚家港曰赭山港曰東陳村港曰混水港以上諸港其詳俱在邑志

甯之龍湫一在長安中間號中間龍潭載邑志

甯之泉四一曰雪峰泉在縣東南五里壽聖院元延祐間盪入海載郡志一曰紫薇泉見縣志一曰靈泉縣志附見於井曰靈泉井泉余謂井與井不同井由人造

甯志備考卷一

九

浦港龍泉井池

泉自地溢當列之泉舊傳有橫浦先生詩載圖經今佚一曰烏龍泉即烏龍井故老相傳謂臯蘇將軍黑馬跑地得泉因以為名則名泉近是

甯之井七曰市邑十井曰馬自然丹井曰葛仙翁丹井曰異井曰禪師井曰義井曰石井俱詳邑志

甯之池五曰泮池邑志不載曰放生池曰白洋池曰磨劍池曰靈龜池。圖經曰靈龜池舊有尼寺今廢有顧況詩

按嶺洞石皆生於山宜附山湫泉井池皆水宜附水邑志外志或列之古蹟或列之水利皆非係古蹟者不妨於古蹟詳見係水利者不妨於水利詳見若但

舉其名自當以類列也

城池 一之六

海甯舊城隋大業十三年築今在縣治西北四十一里
周六百步高八尺唐永徽六年改築今縣治周四百
六十步高二丈濠闊五丈深四尺經見圖入元圮至正
十九年江浙行省命左右司都事陳元龍築高一丈
五尺周七里九十步時有城海甯詩戶部尚書宣城
貢師泰為之序序載邑人胡奎有築城謠載題入國
朝洪武永樂嘉靖間信國湯和都指揮谷詳知縣蔡
完相繼增築高廣鑿池濬濠屹為保障覘邑。余考
郡志云至正十九年張士信城杭州遂城海甯按此

甯志備考卷一 城池 坊市 十

則邑志所謂陳元龍築者何據豈是時士誠降元江
浙行省即士信為之歟

坊市 一之七

邑坊今制十一具詳縣志。按宋坊亦十一其節義安
化曳裾仁賢狀元亞魁六名皆與今同今忠義坊則
宋名忠孝若墨卿信義宣化善化四坊今皆易名矣
宋諸坊皆令魏伯珣建邑人張少良書詳見圖經
甯牌坊十有九俱載縣志其建自嘉靖晚年及隆歷以
來者俱未備

邑市今制具詳縣志。宋圖經云縣市舊在縣西北一
百步唐貞觀四年置開元十一年令路宣遠徙於治

西南二百五十步鄉市二一日長安市一日硤石市
衢巷一之八

入鎮海門而北拱辰門以南橫計之其東為字民坊為
醋坊橋為觀音菴街為酒坊橋街為城隍廟街為瓦
石堰為養濟院巷其西為南寺巷為雙廟巷為錢家
巷為醋坊巷為安國寺巷為北道宮巷為永安橋街
○入春熙門而西安戍門以東從計之其南為勝安
橋街為崇儒坊為雙仁巷為雙廟橋街為永平倉街
為打鐵巷為八營巷其北為亨會坊為惠康橋街為
回回巷為豆腐巷為射圃亭街。出鎮海門而南百
步許即海塘沿海南東西皆沙場鹽舍。出拱辰門

甯志備考卷一 衢巷

十一

而北為厲壇街為田雞街為光華橋街為油車街為
二十五里塘。出春熙門而東為放生街為教場街
為張姬關為道人塘為六十里塘為袁花塘其東南
則海塘也。出安戍門而西為賣魚橋街為社壇橋
街其西南則海塘

橋梁一之九

甯志橋凡四十縣志脫簡可考者僅九余據郡志補三
十一新增一。曰清平橋在縣南八步與鼓樓相對
舊名三思。曰中和橋。曰勝安橋在縣東六十二
步舊名烏鵲宋建泰四年重建一名昇仙。曰嘉泰
橋在縣西東六十餘步舊名善建見圖經云橋側有唐

咸通間所立經幢今不存。曰紀家橋縣西七十三步。曰雙廟橋縣西二百一十四步。曰行春橋縣西二百一十九步。曰醋坊橋縣西一百三十步。曰監橋縣西南二百四十步。曰傅家橋縣西北二百六十六步。曰師古橋縣東北一百二十二步。曰惠康橋縣南東北二百六步。曰永安橋縣西北二百八十五步。曰安國寺橋縣西北三百五十八步。下跨放生池。曰延恩寺橋縣西北三百五十步。曰酒坊橋縣北二百二十四步。跨瓦石堰。曰海昌橋縣東南一里二百一十五步。曰環橋縣東一十里。跨轉塘下北河。曰渾水石橋縣東二十五里。跨轉塘下北河。曰崇教橋縣東四十八里。曰丁家石橋素花市鎮。曰王道橋袁花北鎮達嘉興。曰長安橋縣北二十五里。俗呼虹橋。跨運塘河。曰盧家橋縣西北二十五里。跨運塘河。曰莊婆堰橋縣西北三十里。跨新江河。元至大二年建。曰薛婆橋縣東北一十二里。元至正二十一年建。曰斜橋縣東北二十里。明永樂五年建。曰通浦堰橋縣北五里。跨二十五里塘。下東河。明永樂十五年建。今塞。曰光華亭橋縣北一里一百三十一步。跨二十五里塘。河舊建亭三間於橋上。正德間火燬。今止存橋。葉韜有詩載談志。曰環秀橋縣東北六十里。洪武

三十五年建。曰狀元坊橋宋張九成所居處。新建萬家渡橋長安南三里。以上三十二橋談志載二十六凡郡志所不詳者俱詳談志若中和渾水丁家王道狀元五橋則談志不載

郵傳一之十

甯之急遞鋪凡十有六以傳遞文移者詳縣志

國初因元之舊甯有長安驛今廢詳縣志。圖經云唐時有賦亭驛在縣西南二十步開元中柳遵為邑令置今廢。又有義亭驛在縣西北二十五里地名長安西至臨平驛三十里北至石門驛四十三里貞觀五年置舊名桑亭驛八年改名義亭。又有迎候亭

甯志備考卷一郵傳

三

在縣北二里唐咸通二年置今廢。在宋有光華亭去縣北一里宋淳熙四年令魏伯珣置又有海昌館在縣。三百五十步舊名班宣後改宣化嘉定元年令潘景夔重修改今名。又有海昌亭在縣西北二十五里長安上閘之旁自杭循東道行上湖必於此艤纜以需啓鑰閘亦有亭舊無名

按今之漕運及使節往來皆取道下河長安吉驛湮廢已久此條似亦可削但自崇德而南凡取道上河者信宿抵杭比下河實便故今之商旅由上河者往往十六七異時滄桑變易事固難知仍存以備考